

LIS PREDICJIS DAL MUINI

di pre Josef Marchet - Udin, 1965

Il galandin

Vêso savude la ultime? A son stâts a robâ l'aur sul altâr di Madone di Gracie a Udin. Cui? Se o spietais che ju cjatin!... Ma si po scrupulâ, cence lâ lontan de veretât, che si trati di cualchidun che ju veve curts par fâ carnevâl. Cheste e je la stagjon des robariis di ogni fate, par vie che il carnevâl al coste cjâr a cui che al si crôt obleât a divertîsi par no vê rimuars di vieli. Massime a cui che al à la manze di menâsi daûr! Prin di dut al tocje vistîsi... e vistîle. No si po lâ intune fieste di bal cu la mude di mieze sagre, ni tirâsi daûr une scaie cu la cotule a mieze gjambe e lis scarpis compradis sul barachin di Scajole, il dì di marcjât. Po dopo a son lis "stazions" sportivis: al ven a stâi dulà che si va a sgliciâ. Al vûl un vistît di pueste cul cjamesot impermeabil, cui scarpons di trê kilos, e dopo ducj i argagns che a coventin par fâ marculis inte nêf. E ancje pe campagne a vuelin lis braghessis che a metin in bieles mostre la mape dal mont largje come la braide di Meni Bacan. Po dopo e je di paiâ la locande, i gustâs, lis cenis, lis agarolis, i golosets... che lis polecis di chel gjenar, cuant che a fasin il lôr dovê, a pratindin i lôr dirits. E cussì, se no 'nd è tal tacuin si va a cjoliju dulà che a son.

Si impensaiso di Bepo Maron? Eh no voaltris, gjarlis, che o sês nassudis îr l'altri! Bepo Maron al varà la mê etât; al à passade la vite par chês peresons - une condane daûr l'altre, simpri plui cjalcjadis par vie des ricjadudis - e cumò al sarà a cirî la caritât a Padue o a Vignesie o saio jo dulà. Po ben, Bepo Maron al è stât un pieç di agns pal mont cun me; al jere un lavoradôr che par dute la stagjon i dave sot: aghe di vite e vueli di comedon. E nancje nol è di dî che ju strassàs. Ma rivât a cjase, e massime di carnevâl, cui lu tignive? Jo o vevi tal cjâf di fâmi chel fregul di cjase, e an par an ju metevi di bande ducj, un parsore l'altri, fintremai che o 'nd ai vûts avonde par comprâ il fonts e tirâ sù chel lûc che o soi a stâ ancjemò; mi è restât ancje un claudut, che o ai scugnût sparagnâ altris trê cuatri agns par finî di stropâlu. Lui, Maron, la menave grande: fintremai a Vignesie al veve cûr di lâ, che in chei agns dome i siorons si permetevin di fâ un tant. E nol lave ator di bessôl: un an une sartorele di Udin, chel altri une chelare di Pordenon cjatade a Gurize cuntun siôr di Cividât, e po Vigjute Tofule, culî di Gargagnà, che la vês cognossude putrops e che un Istât e je scomparide e nissun sa ce fin che e à fat. Fintremai che e je vignude chê altre vuere e nus àn sieradis lis puartis. Lui al à tacât di soldât a cognossi lis peresons e nol è stât bon di bandonâlis plui di cualchi mê a lunc. E nol è di dî che, cundut achel, no ur fasès gole a plui di une pulzete dal paîs: juste mê comari Sese - Taresie la More, al vignarès a stâi - e Gjudite di Tin e Livie

Bortulate no vevin vôi altri che par lui, che nancje no si voltave, parcè che i plaseve robe plui fine e nol voleve cjaris in paîs. E jo, se o ai volût cjatant une di sest, o ai scugnût lâ a cirîle fint a Pavie.

E po... lassin stâ, che al è miôr, se no mi scjampe di dî alc inte cjase dal Signôr... Sturnelatis di feminis dal tartaifil - che Diu mal perdoni! - simpri daprûf dai plui scjavacecui a van a tacâsi. E dopo vaî, che il Signôr nol fâs lis robis justis e che a lôr ur tocjin dutis lis batiduris! Metêt dentri une prese di sâl inte pensatorie, vedè, altri che dai la colpe ae Providence. Juste voaltris, parussulis di prime plume...

Messe aes siet e gjespui aes cinc, doman. Buine sere. (josef marchet)